

COMUNU DE NURAGUS PROVÌNTZIA DE CASTEDDU
UFÌTZIU DE SU SÌNDIGU

Ordinàntzia sindacali n.06/14 de su 10/09/2014

A su Cumandu de Polìtzia municipali -SEDI

A su Cumandu de sa Cumpangia barracellari-Nuragus

A su Cumandu de s'istatzioni CC Nuragus

A TOTU SA POPULATZIONI

Ogetu: Acàstiu e ghia de is canis

Cunsiderau ca su terrenu pùblicu o de pùblicu disponimentu (bias, marciapèis, pròcius, pratzas, zonas birdis, ecc.....) costumat a s'agatai imbrutau de stercu de animalis po mori de su pagu incuru de is meris de is canis o de chini ddus passillat, ponendi in custa manera in perìgulu is tzitadinus e prus che totu is pipius, is bècius e is chi tenint problemas de vista, in prus de èssiri pagu decorosu po sa bidida;

Cunsideraus fintzas is problemas igiènicu-sanitàrius chi ndi podint sighiri po mori de sa presèntzia de stercu de canis in custas zonas de sa bidida;

Essendu pretzisu chi is meris de is canis o is chi funt incarrigaus de ddus passillai portint sèmpiri palitas, sachitus de plàstica o cali chi siat àtera aina chi potzat èssiri impreada po ndi boddiri su stercu de is canis;

Apretziau de dèpiri garantiri cunditzionis de limpiesa e igieni a sa bidida e prus seuresa a is tzitadinus chi si ddui movint;

Bistu:

-su Regulamentu comunali de igieni sanidadi pùblica e veterinària

-su Regulamentu de sa Politzia Urbana;

-sa lei 24.11.1981 n. 689;

-s'art. 107 de su D. Lgs. n.0 267 de su 18.08.2000

ÒRDINAT

a is meris de is canis e a is personas incarrigadas de ddus chistiri, a fàiri in manera chi s'animali no imbrutit is bias, is marciapèis, is zonas de atraessamentu pedonali, is intradas de is domus, is giardinus pùblicus a impreu de su tzitadinu e su logu totu a ingìriu.

Cun custu scopu si pretzetat a is meris de is canis o a is chi funt incarrigaus de ddus chistiri:

1) de si cuberai pintzas, palitas e sachitas de plàstica po ndi boddiri su stercu de is canis.

2) de torrai a allichidiri boddendindi in deretura su stercu candu s'animali imbrutat unu de is logus nomenaus in pitzus.

3) de non fàiri intrai is canis, ne scapus ne acapiaus, in is giardinus pùblicus.

4) de chistiri is canis in manera chi non si nd'andit a solus peri is bias pùblicas.

Is òbligus previdius in custa ordinàntzia non funt impostus a is tzurpus chi impreant canis-ghia e a personas cun handicap fisicu o mentali.

Is chi faint contras a s'òbligu de ndi boddiri su stercu de is logus pùblicus nomenaus in pitzus, ant a pòdiri arriciri una cuntravenzioni amministrativa chi andat de € 25,00 a € 150,00, segundu s'art.7-bis de su Decretu Legislativu n.267/2000 Testu Ùnicu Entis Localis.

Is violadoris de cust'òbligu funt amìtius a pagai in mesura ammenguada, est a nàrriri un'importu de € 50,00, aintru de 60 diis de candu est averiguada sa violatzioni o de candu est stètia fata sa cuntravenzioni, segundu s'art.16 de sa Lei n.689/81.

Contras a custu provedimentu si podit fàiri recursu in su Tribunali Amministrativu Regionali in sa manera previdia de sa Lei n.0 1034 de su 06.12.1971 e modificas imbenientis, o a su Presidenti de sa Repùblica in sa manera previdia de su D.P.R. n. 0 1199 de su 24.11.1971 a 60 e 120 diis de sa dia de publicatzioni);

INCÀRRIGAT

de fàiri arrespetai custa ordinàntzia, ponendi sa cuntravenzioni chi spetat, a su Cumandu de Politzia Locali, su personali de sa Cumpangia barracellari e is àteras fortzas de Politzia incarrigadas po s'iscopu

DISPONIT

chi custu provedimentu siat spartzinau a totu sa populatzioni po mèdiu de avisus pùblicus o impreendi s' Albu Pretòriu po 20 diis de candu bessit s'ordinàntzia.

Una còpia de cust'àutu fait a dda pediri in su Cumandu de Politzia Locali.

SU SÌNDIGU
Franco Latti